



# SPORT E SORDITÂT: UNE LENGHE E UNE IDENTITÂT DUTIS DI SCUVERZI

L'incontri tra sport e sorditât nol è cussî resint come che si parârès pensâ, anzit. E rimonte adiriture al 1924 la organizazion di bande di Eugene Rubens-Alcais, a Paris, de prime edizion des Deaflympics, vâl a dî lis olimpiadis pes personis sordis. Il sport al rapresente di simpri un valôr impuartant pai sorts: di fat, di là dal aspjet competitîf, al davuelç un rûl culturâl e sociâl fundamentâl inte comunitât sorde. I avigniments sportîfs, dai plui piçui a chei internazionai, a rapresentin pai sorts une ocasion par cjatâsi insiem e par afermâ la esistence di une comunitât vive e indipendente. Dal balon al rugby, dal volley aes burelis, sedi pes scuadris femininis che par chês masculinis, in gran part dal mont i atletis sorts si son dâts dongje in societâts sportivis indipendentis e sieradis, preferint considerâsi une minorance culturâl – pluitost che personis disabilis – dulà fondâ la identitât de lôr lenghe, chê dai segns. La comunicazion tra personis sordis, di fat, e dopre une lenghe a ducj i efietis ma che no je universâl: chest al vûl dî che e je diferente par ogni Paîs, propit come lis lenghis feveladis. I atletis

sorts a ricevin informazions in maniere complete e paritarie dome dentri dai grups (o "clubs") par sorts, dulà che la comunicazion e passe te lenghe dai segns: chest ur da la pussibilitât di praticâ la ativitât sportive in plene autonomie. La sorditât, ancje se di fat no rapresente un impediment, no permet ai sorts di zuiâ in maniere paritarie parcè che e influis no dome sul aprendiment dai



moviments ma e impedîs ancje di percepî lis informazions che a passin par vie acustiche, come par esempli il svicinâsi di un altri zuiadôr: details che intune gare a fasin la diference.

Al è ancje di dî però che lis personis sordis, vivint intun mont "che al sint", a son dispès in grât di svilupâ capacitâts di adatament sveltis, tant che la leture labiâl, e che in diviersis bandis di Italie a son compagns di scuadre disponibii a imparâ la lenghe dai segns: par chest al è facil cjatâ societâts mistis, dulà che a zuin insiem personis sordis e personis che a sintin, cence nissune dificolât, midiant des strategiis concuardadis e disvilupadis tai alenaments cuotidians.

Ducj i grups sportîfs e i campionâts che si organizin, cu la scuse dal sport a smirin a coinvolzi personis e zovins che difilmentri a son vignûts in contat cun altris sorts te lôr vite, metintju a cognossince di un mont che ur è discognossût ma che al puarte cun se une lenghe e une identitât ben specifiche, dute di scuverzi. Il sport, duncje, al devente un mieç di integrazion e cuintri l'isolament.